

Dia 4 di februari lo tin apertura oficial

Trabaonan na Carnival Village San Nicolas ta on schedule



ORANJESTAD (AAN): Dos siman pasa Minister Otmar Oduber encarga cu Desaroyo Teritorial, Infraestructura y Me-

dio Ambiente conhuntamente cu representante di SMAC, Musica, San Nicolas Business Association, DOW y contratista



a anuncia e proyectonan tumando luga na Carnival Village.

Esnan cu ta frecuenta San Nicolas por aprecia e trabaonan duro tumando luga pa logra finalisa cu e prome fase, prome cu e festival di Caiso & Soca Monarch cu lo tuma luga na elugar. E apertura lo ta dia 4 di februari, e prome anochi di pre final di Caiso and Soca Monarch. Conhuntamente cu Minister di Cultura, ta invita henter comunidad di Aruba, specialmente musiconan y nan famia pa asisti e dedicacion aki combinando pasado cu presente. Dunando honor na



un di e actividadnan cultural di mas grandi na Aruba.

Den e conferencia di prensa Minister Oduber a splica cu



Gobierno a percura pa pone mas cu poco mas cu 1 miyon Florin disponibel for di aña pasa pa e proyecto. E proyecto ta reparti den diferente fase cu ta encera un stage multi funcional unda cu SMAC y Musica lo tin oficina cu espacio pa opera manera cu tabata e intencion inicial cu Carnival Village. Cu e desaroyonan aki no lo uza Carnival Village solamente algun biaha pa aña cu mayoria bes ta den temporada di Carnaval, sino cu e por ta activo pa diferente otro actividadnan henter aña. Ya caba comunidad por aprecia e 'cara' di Carnival Village cual ta trata di e mural di homenahe na personanan/figuranan grandi di Calypso y Roadmarch di pasado.

Despues di e periodo di carnaval lo traha riba dos otro fase cualnan ta construccion di 6 kiosko (tres cada banda). E kioskonan aki tambe lo por sirbi comunidad henter aña y lo por huur esaki via Directie Infrastructuur en Planning (DIP), mescos cu ta tuma luga na linear park na playa. Lo crea facilidad di baño tambe pa por duna e servicio aki tambe henter aña. E desaroyonan aki ta significa cu lo no mester di tent mas pasobra lo tin kiosco y lo tin baño den Carnival Village mes. E trabaonan aki ta planifica pa termina final di juni pa despues cuminsa cu planificacion di e stage y oficianan, Minister Oduber a splica. Pa conclui, ta gradici Gabinete Wever-Croes, DOW y tur trahando riba e proyecto pa por logra realisa esaki den e forma mas rendabel cu ta posible.